

इपीसि इपीसि विस्वासुल्कुंक पौलुसना सिट्टि

इद सिट्टिटा बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस इद सिट्टिटुन जेलने मत्तास्के रासतोर. पौलुस येसुना बारेमता बेसता कबुर वेहालय रोंडो मल्का पय्नेम होत्तास्के ओर ई इपीसि सहरतेगुडा होंचि मत्तोर. ओर ई सहरते मोदाला होत्तस्के वेल्ले रोजकु मनाहिल्लोर गानि ओना मूडोव मल्का पय्नेम होत्तस्के अगा कोन्नि वर्सनदाका मत्ताप प्रेरितुल्कुना कबाहक पुस्तकमते मनाकु तेळियसि दांता.

पेनदा लोप्पो अंतोर विस्वासुल्कु उंदासि पेनदा उदूदेसमतुन एरपाट कीसि पिसागोम, अल्हेने कलिसिया इत्ते उंदि मेंदुललेसीं मंता. दान्क किरिस्तु तल्लालेसीं मंतोर. अय्ते मनम विस्वासुल्कुम आ मेंदुल्ला बागाल्कुम आंदुम. मेंदुल्ला बागाल्क बल्हा उंदान्क-उंदि बेस कलियसि मनंतंगो अल्हेन मनमगुडा मत्ते, पेन दाना उदूदेसम परकारम मनाकु पिस्वरतुन हींता. पेनदा पोल्लेतुन इपीसि सहरता विस्वासुल्कुंक वेहनाहाटीं पौलुस इद सिट्टि रासतोर. अचोने आयाका वरोर विस्वासि किरिस्तुना लोप्पो बल्हा मनना, मुत्तो-मुय्दो, मालक-दासुड, तल्लुर-बाबो मर्क-मियाहक बल्हा मनना इवन्नि अवसरमाता पोल्लेगुडा पौलुस इद सिट्टिते रासतोर.

बगा बतल मंता

जोहार आनि परिचयम 1:1-2

किरिस्तु आनि कलिसिया 1:3-3:21

किरिस्तुन विस्वासम कीसि दुनियाते पूना पिस्वर पिसमळ 4:1-6:20

आकिरता बोदां 6:21-24

जोहार

1 नना पौलसुन, पेनदा इच्चा परकारम, किरिस्तु येसुना प्रेरितुन आतन. इपीसि सहरते मनना किरिस्तु येसुन विस्वासम कियाना पेनदा लोकुकुकुंक नना इद सिट्टि रासेक मंतन.

2 मना पेनबाबानहेंदाल आनि सामि येसु किरिस्तुनाहेंदाल मीकु कुर्पा, सांति दोर्किकांटी.

किरिस्तुनहेंदाल दोर्काना आसिर्वाडाल्क

3 मना सामि येसु किरिस्तुना पेनबाबांक दन्यवाद. ओर किरिस्तुनाहेंदाल, मना बक्तिकु संबंदिस्तव स्वर्गमते मनना अन्नि आसिर्वाडाल्क मनाकु हीसीतोर.

4 अद बल्हा इत्ते, मनम पेनदा नदरते पवित्र आनि दोसेम हिलाकोटा मंदना इंचि, पेन ई दुनियातुन पुट्सकामुन्नेन अद मनाकुन किरिस्तुना लोप्पो पेरकुत्ता.

5 पेनदा पावरमता पिलान परकारम, येसु किरिस्तुनाहेंदाल मनम दाना पिलाल्क आयाना इंचि अद मनाकुन मुन्नेन पेरता. ई पिलान पेनदा इच्चा परकारम मत्ता इंचि पेनदुक इल्हा कियमळते कुसि दोर्कता.

6 दाना पावरमगल्ला मरि मनाहाटी कीतदुन पीसि, अद मनापोर्रो लेक्का परवच्चोन कुर्पातुन पुक्कटते कुम्मरिच्ता. अदुनहाटी मनम पेनदा महिमाता स्तुति कीकोम.

7 किरिस्तु ओना सतता नेत्तुरतुन पोंगागोटताहेंका मना पापाल्क मापि आसि मनाकु मुक्ति दोर्कता. इल्हा पेन दाना वेल्लेन कुर्पातुन मनापोर्रो कुम्मरिच्ता.

8 अद मना बुद्धिदक, तेल्विक हालानाल दाना दया हियमळ जर्गता.

9 पेन मुन्नेने निरनायम कीता, दाना इच्चा परकारम मत्ता मर्ममता पिलानतुन, मनाकु किरिस्तुनाहेंदाल कुल्ला कीसि वेहता.

10 अद बतल इत्ते, पेन दाना पिलान परकारम इन्कुत्ता वेला एवतस्के, स्वर्गमते मत्तव, बूमिपोर्रो मत्तव अन्निगुडा उंदगा कीसि अवुन किरिस्तुना अदिकारम हिळु हियमळ गावाले.

11 पेन अन्निटवुन दाना इच्चा मत्ताप पिलान कीसि ताकसंता. अदे पिलान परकारम मनाकुन पेनदा लोकुल्क इंचि मुन्नेने किरिस्तुना लोप्पो पेरमळ जर्गता.

12 मनम बोर अयते मुन्नेटाले किरिस्तुनपोर्रो आसे इरतोम, दाना महिमातुन तल्सकुनागोम इंचि दाना विचारम मंता.

13 मीकु मुक्ति हीता बेसता कबुर सत्तेम आंद अदुन मिमेटगुडा केंजतिर. केंजसि किरिस्तुना लोकुल्क आयानाहाटी ओनपोर्रो विस्वासम इर्तिट. अस्के पेन हीता पोल्ले परकारम पवित्र आत्माता सिक्का मीपोर्रो वाटमळ जर्गता.

14 पेन बोर्कुन अयते अस्कुलता ओरा मुक्तिहाटी, दाना पवित्र आत्मातुन वारसान हक्कता उंदि इसारालेसी मनागा इरता. अदुनहाटी लोकुल्क दाना महिमातुन तलसकुंतुर.

इपीसि विस्वासुल्कुनाहाटी पौलसना पारतना

15-16 अदुनहाटी बस्केटाल अयते नना, सामि येसुना पोरोटा मीवा विस्वासम बारेमते आनि पवित्र लोकुल्कुन मिमेट बेस पावरमते हूळातिर इत्तदुना बारेमते केंजतन, अस्केटाल नना नावा पारतनाते मीकुन मति कीसेके, मीवाहाटी पेनदुक बस्केळक दन्यवाद वेहासेक मंनंतन.

17 अचोने आयाका मना सामि येसु किरिस्तुना पेन, इत्ते महिमाते निडिस मत्ता पेन बाबल, ओना बारेमते मिमेट इंका बेस एरपाट कियानाहाटी ओना पवित्र आत्माहेंदाल मीकु बुद्धि आनि बेस तेलिचकुननाहाटी तेल्वि हिथ्यिर इंचि पारतना कीसेक मंतन.

18 अल्हेने, पेन मीकुन बद आसेताहाटी केयता? दाना पवित्र लोकुल्कुंक अद हिथ्याना वारसानहक्कताल दोर्काना महिमाता दनम बल्हा मंता? इदुना बारेमते तेळियानाहाटी मीवा मनसुना वेळसि एल्गागोट्टि.

19-20 अचोने आयाका किरिस्तुन हामुरताल मर्रा जीवाते तेहाचि स्वर्गमते दाना तिना बाजुंक उपिचनेके पेन दाना पेद्दा ताकततुन हुपिस्ता. अयते मनम किरिस्तुन विस्वासम कियानोरम उंदि आयालयगुडा अदे पेद्दा ताकत दानागा मंता. पेनदा ताकत बस्केन मारो, इदुन पेन मीकु तेळियागोट्टि इंचि नना विनंति कीसेके मंतन.

21 इद कालमतेन आयो गानि, मुन्ने वायाना कालमतेगुडा किरिस्तुनलेसी कदर आनि अदिकारम मत्तोर बोरे मन्नोर. इल्हा किरिस्तु दुनियाते मनना राज्येम कियाना अदिकारिल्क, वेरे अदिकाराल्क, कळकुंक दिस्सुवव अन्नि ताकतकु आनि इंका अन्निटवुंकन्ना पेद्दोड आंदुर.

22 पेन इव अन्निटवुन किरिस्तुना कालकुना हिळु कीसि, इव अन्निटवुनपोर्रो ओन्क अदिकारम हीता. हीसि ओरे अन्निटवुना मुक्यल आयागोम इंचि ओन कलिसियाकु हीसीता.

23 कलिसियातोर इत्ते किरिस्तुना मेंदुल आंदुर. ओना मेंदुलतुन ओर अन्नि तीरकुने, अन्नि पोल्लेने पुरागा निह्चि अन्निटतुन पुरागा कियानोरगुडा ओरे आंदुर.

2

पेनदा दयातेन मुक्ति दोर्कता

1 मुन्ने मिमेट तप्पु कबाहक कीसि, पापालक कीसि आत्माते हासि मत्तिर. गानि मीकुनगुडा किरिस्तु जीवाते तेहातोर.

2 मिमेट मुन्ने इद दुनियातोर ताकाना रीति-रिवाजकुन पीसि ताकिदिर. पोर्रो वळिते तिरियना देय्याल्कुना मुक्क्यल बल्हा ताकिस्ते अल्हा ताकिदिर. इंदकेळकगुडा पेनदा पोल्ले परकारम ताकवोर लोप्पो अद आत्मा कबळ कीसेके मंता.

3 मनम अंटोरमगुडा मुन्ने मना मेंदुलता आसेन परकारम पिस्सुंदुम, मेंदुल आनि मनसुना इच्चां पुरागा कियानाहाटीं कराब विचाराल्क कीसेके, ओरा नड्डुम ओरालेसीं ताकतोरमे आंदुम. पेनदुन बरोसा कियवोरा गुनम मत्ताप मना गुनमगुडा मत्ताहेंका, मनम पेनदुक होंग वायाना पिस्वर पिस्सेक मत्तोम.

4 गानि पेन बच्चोनो दयागल्लद आंद, अद दाना पेद्दा पावरमते मनाकुन पावरम कीता.

5 मनम तप्पु कबाहक कीसि हासि मत्तास्के मनाकुन अद किरिस्तुनतोनि जीवाते तेहाता. पेन कुर्पा कीताहेंकेन मीकु मुक्ति दोर्कता.

6 अचोने आयाका किरिस्तु येसुनतोनि मनाकुन जीवाते तेहाचि, स्वर्गमते ओनतोनि मनाकुनगुडा उपिस्ता.

7 इंका किरिस्तु येसुन मनाहाटीं लोहचि मनाकुन वेल्लेन पावरम कीता. इल्हा पेन मनापोर्रो लेक्का हिल्वच्चोन कुर्पा कीता, इदुन वायाना कालमते अंटोर्क हुप्सानाहाटीं पेन अल्हा कीता.

8 पेन कुर्पा कीताहेंकेन मिमेट किरिस्तुनपोर्रो विस्वासम कीतिर. मीवा विस्वासमतुन पीसि मीकु मुक्ति दोर्कता. इदंता मीवा क्यदाल जर्गतद आयो गानि पेन हीता वरम आंदु.

9 इद कबाहकुनाहेंदाल दोर्कतद आयो, अदुनहाटीं बोरे पोंगुडतनम वेहकुना मन्नि.

10 बारित्ते, पेने मनाकुन पुट्टिस्ता. मनम किरिस्तु येसुनलोप्पो बेसता कबाहक कियाना इंचि अद मनाकुन पुट्टिस्ता. अव बेसता कबाहक बव आंदुंगो अवुन पेन मुन्नेने तयार कीसि इरता.

येसुना लोप्पो मनम अंटोरम उंदे आंदुम

11 मिमेट यहुदि आयवोर इंचि मीवा कतना आयाहिल्ले. गानि बोरद अय्ते कतना मनकानाहेंदाल आतानो, ओर मोमोट कतना आतोरम, इंचि वेहकुंतुर. मीकुन बारे, कतना आयवोर, इंचि कारेड्डाल्क कीतुर. अदुनहाटी मिमेट बल्हा मनिदिरो अदुन मति कीम्ट.

12 अद कालमते मिमेट किरिस्तुनलोप्पो कलियका मत्तिर, मिमेट इम्राएल लोकुल्क आयवाहेंका मीकु पेनदा नियमाल्क दोर्का हिल्लें, करार्क कियाना बारेमते पेन हीता पोल्लेताल मीकुन लक्कु इरमळ जर्गता. मिमेट इद दुनियाते बदे आसे हिलुवा, पेन हिलुवा पिस्वर पिस्सेक मत्तिट.

13 मुन्ने मिमेट पेनदागटाल लक्कु मत्तिर. गानि किरिस्तुना नेत्तुरहेंदाल इंदके मिमेट किरिस्तु येसुना लोप्पो पेनदुक दग्गेरा आतिर.

14 बारित्ते, यहुदिल्क आनि यहुदि आयवा मना नड्डुम मनाकुन वैरे कियानाहाटी पगातद उंदि ग्रे मत्ता, अदुन कूलाहिचि मनाकुन इव्वुर्कुन कल्पतोर किरिस्ते आंदुर. ओनाहेंदाले मनाकु सांति दोर्कता.

15 यहुदिर्कुन आनि यहुदि आयवोर्कुन इव्वुर्कुनगुडा उंदगा कल्पिसि वरोर पूना मनकन पुट्टिस्ताप, अंटोर्कुन उंदि कीतोर. इल्हा वैरे-वैरे आसि पिसानोर्कुन कल्पतोर. इल्हा ओर्कुन कल्पानाहाटी ओर ओना मेंदुल्लुन हीसि आदेसाल्कुना बव अय्ते यहुदिल्कुना नियमाल्क मत्तांगो, अवुन नासडेम कीतोर. आनि मनाकु सांतितुन हीतोर.

16 पजा ओर ओना जीवा कूसुनपोर्री हीसि मना नड्डुम मत्ता पगातुन नासडेम कीतोर. इल्हा वैरे-वैरे आसि मत्ता मनाकुन उंदि मेंदुल कीसि पेनदा लोप्पो कल्पतोर.

17 किरिस्तु इद दुनियाते वासि, पेनदागटाल लक्कु आसि मत्ता मीकु आनि दग्गेरा मत्ता ओर्कु सांतिता बेसता कबुरतुन वेहातोर.

18 बारित्ते ओनाहेंदाले मनम इव्वुरमगुडा उंदे पवित्र आत्माते पेनबाबानगा होना परांतोम.

19 अदुनहाटी मिमेट इंदके परायतोर, वैरे देसेमतोर आयिर, गानि पवित्र लोकुल्कुनतोनि दंटाते कूळसि मननोर आनि पेनदा लोता लोकुल्क आदिर.

20 अचोने आयाका प्रेरितुल्क आनि पेनदा कबुरतोरा पुनादिपोर्रो येसु किरिस्तुन मूला बंडालेसीं ईसि दोहता लोहकु मिमेटे आंदिर.

21 पूरा लोन ओनाहेंदाले तयार आंता आनि सामिना लोप्पो उंदि पवित्र गुळि आयालय बेरसेकेन होंचंता.

22 अठे मिमेटगुडा पेनदा आत्माहेंदाल पेनदुक मनालय उंदि आसि जेगा तयार कीसेक मंतिर.

3

मर्ममते मत्तव पेनदा पोल्लें पलाते अरमळ

1 मिमेट यहूदिल्क आयिर. अयनागानि मीकु किरिस्तु येसुना बारेमता बेसता कबुर वेहताहाटीं नना पौलुस, जेलने बंद मंतन.

2 पेन दाना कुर्पाता बारेमते मीकु वेहना जिम्मेदारि नाकु हीता इंचि मिमेट केंजसे मंदकिट.

3 पेनदा सत्तेम मोदाला मर्ममते मत्ता, गानि अदुन इंदके पेन नाकु बैयरा कीसि हुपिस्ता. इदुना बारेमते मीकु नना मुन्ने गिचचचो रासि मत्तन.

4 अदुन मिमेट हदुवकिर अस्के किरिस्तुना बारेमता आ मर्ममता पोल्लें नाक बल्हा तेळियतां इंचि मिमेट एरपाट कीकिट.

5 आ मर्ममता सत्तेमतुन पवित्र आत्माहेंदाल पेन दाना प्रेरितुल्कुंक आनि दाना कबुरतोरुंक इंदके बल्हा वेहतानो, अल्हा अस्केटा कालमता लोकुल्कुंक वेहमळ जर्गाहिल्ले.

6 आ मर्ममता पोल्ले बतल इत्ते, यहूदि आयवोर लोकुल्क बेसता कबुर केंजसि किरिस्तु येसुनपोर्रो विस्वासम इरतुर, अदुनहेंदाल ओरगुडा यहूदि विस्वासुल्कुनतोनि कलियसि येसुनगा दोर्काना हक्कुने वारसदार्क आतुर. इल्हा ओर उंदि मेंदुलतोर आनि पेन हीता पोल्लेते हिस्सादार्क आतुर.

7 पेन दाना कुर्पाता वरम परकारम अद नाकु हीता ताकतहेंदाले नना ई बेसता कबुर वेहाना सेवाकुन आतन.

8 पवित्र लोकुल्कुना लोप्पो नना अंटोर्कन्ना सिन्नोन आंदुन. अयना पेन नापोर्रो कुर्पा कीता. अद बतल इत्ते, किरिस्तुनगा लेक्का हिलुवा आसिर्वादाल्क मंतां, अदुना बारेमते यहूदि आयवोरगा होंचि वेहना वरम पेन नाकु हीता.

9 अन्निततुन पुट्टिस्ता पेन, मोदोलताल मर्ममते इर्सि मत्ता दाना पिलानतुन बल्हा पुरागा कीता, इत्तदुना बारेमते हरेक मनकंक कुल्ला-कुल्ला कीसि वेहनाहाटीं नाकुन पेरता.

10 इंदके पोर्गे वळिते राज्येम कियाना सक्तिंक आनि अदिकारम ताकिचानवुंक पेन दाना बच्चुंगो तीरकुना तेल्वितुन कलिसियाहेंदाल हुप्संता.

11 मुन्नेटाले पेन इल्हा कियाना विचारमते मत्ता. इंदके मना सामि किरिस्तु येसुनाहेंदाल पुरागा कीता.

12 किरिस्तुनपोर्गे विस्वासम इरताहाटीं, इंदके वेरियाकोटा दैनेमते पेनदा दगोरा होना परीतोम.

13 मीहाटीं नाकु आयाना तकलिपकुन हळसि मिमेट पजोळक आयमट इंचि मीकु विनंति कीसेक मंतन. नना अर्ना तकलिपकुनाहेंदाल मीके कदर दोर्कता.

मनसुने किरिस्तु मननाहाटीं पौलुसना पारतना

14 इदुनाहाटीं गें नना पेनबाबाना मुन्ने टोंगरां ऊनसि पारतना कीसेके मनंतन.

15 सिराप ओनाहेंदाले स्वर्गमते आनि बूमिपोर्गे मनना हरेक कुटुंबकु पोरोल इरमळ जर्गता.

16 पेनबाबाल ओना वेल्लेन कदरगल्ला महिमाता दनमतुन पीसि, ओना आत्मातोनि मीवा पिस्वरतुन लोप्पोटाल इरगा गट्टिगा किथियर इंचि पारतना कीसंतन.

17 दीनहेंदाल मीवा विस्वासम परकारम किरिस्तु मीवा मनसुने जेगा पीसि मनंतोर. अस्के मरा हिहकु बल्हा बूमिंते लोप्पोळक होंचि मरातुन गट्टिगा पीसि मनंतंगो, अल्हेन मिमेटगुडा पेनदा पावरमता पुनादिपोर्गे हिहकुनलेसीं गट्टिगा निल्लिसि मंदकिट.

18 पेनदा लोकुल्लुकुनतोनि मीकुगुडा किरिस्तुना पावरमता नेरवुन, पोडुगुन, एत्तुन आनि लोतुन तेल्पिचकुनना ताकत दोर्कि.

19 अचोने आयाका, मना तेल्वितोनि मनम तेल्पिचकुना परींम, असोंटा किरिस्तुना पावरमतुन तेल्पिचकुंचि, पेनदा गुनमते पुरागा निडिस होंटु, इंचि पारतना कीसेके मंतन.

20 इंदके पेन मना पिस्वरता लोप्पो दाना ताकत परकारम कबळ कीसेकेन मंता. इचोने आयो, मनम तल्कानदुंकन्ना, मनम विचारम कियानादानकन्ना एक्को, अद मनालोप्पो कबळ किय्या परींता.

21 कलिसियाते किरिस्तु येसुनाहेंदाल बस्केळक पीळि-पीळिनदाका पेनदुके कदर दोर्कि, आमीन.

4

येसु सामिना लोप्पो अंटोर कलियसि मनना

1 मीकून पेन दाना लोकुल्क आयानाहाटीं केयता, अयते दाना लोकुल्क बल्हा अयते पिसानो अल्हा मिमेट पिस्सट इंचि, सामिनाहाटीं जेलुंक होत्तोन नना मीकु विनंति कीसंतन.

2 दीना अर्तम बतल इत्ते, मिमेट सादा सिंपल मनना, बोर बतल इनिनागानि ओप्के पीसि मनना, वरोंक-वरोर ओर्सकुंचेके पावरमते पिस्सट.

3 पेनदा पवित्र आत्मा मीकून सांतिते उंदि कीता. अयते आ सांतिता एकतातुन मिमेट बेस कापाळसि इराना कोसिसते मंटु.

4 अंटोर विस्वासुल्कूनद उंदे मेंदुल आंद. अव्ते मनना पवित्र आत्मागुडा उंदे आंद. अल्हे अंटोर विस्वासुल्कूनगुडा पेन उंदे आसेते पिस्सालय केयता.

5 मना अंटोरा सामि वरोरे, मनम अंटोरम उंदे विस्वासम कीतोम आनि बापतिस्मागुडा उंदे बापतिस्मा एततोम.

6 मनाकु अंटोर्क वरोरे पेनबाबाल मंतोर, ओरे मना अंटोरा पोर्गे मंतोर, ओर मना नड्डुम मंतोर, अंटोरा नड्डुम ओरे मंतोर.

पेन हियाना वराल्क

7 गानि किरिस्तु, वेंरे-वेंरे कबाह्क कियानाहाटीं, मनावेटाल वरो-वरोंक ओना पूरा मनसुनाल उंद-उंदि विसेस कुर्पाता वरम हीतोर.

8 अदुनहाटीगे ओना बारेमते दर्मसास्त्रमते इल्हा रासि मंता:

“ओर पोर्गे एत्तु एक्किसि होत्तोर, जेलने मत्तोर्कुन दोहचि ओतोर,
मनकालोर्कुंक वराल्क हीतोर.”☆

इंचि रासि मंता.

9 ओर, “पोर्गे एक्किसि होत्तोर” इत्ता पोल्लेता अर्तम बतल? दीना अर्तम, ओर बूमिता हिळुदाकागुडा रेय्सि वातोर इत्तापे गदा!

10 बोर अयते हिळु रेय्सि वातोर, ओरे बतले तक्को मनाकॉटा अन्निटतुन पुरागा कियानाहाटीं अन्नि मब्बुकुंकन्ना एत्तु जेगाते एक्किसि होत्तोर.

11-12 ओर, पेनदा सेवाहाटीं पवित्र लोकलुकुन तयार कियालय आनि किरिस्तुना मेंदुललेसीं मनना कलिसियातोरुकुन बेस बक्तिते, बरोसाते बेसीगोटनाहाटीं, इच्चुर्कुन प्रेरितुल्क, इच्चुर्कुन पेनदा कबुरतोर, इच्चुर्कुन बेसता कबुर वेहानोर आनि इंकिच्चुर्कुन बारे पास्टर आनि कराहनोर इंचि पेर्सि ओर्कु वराल्क हीतोर.

13 दीनहेंदाल मनम अंतोरम पेनदा मरिना पोर्रोटा विस्वासम आनि ओना बारेमता जानकारिते उंदासि मनंतोम. इंका बद्दे पोल्लेते आयि किरिस्तु बल्हा अयते बतले तक्को हिलाकोटा मत्तोर, अल्हेने मनमगुडा मना परंतोम.

14 इल्हा मत्ते बतल आंता इत्ते, बोरे अयते आबद्दम, तप्पुड बोदां कराहचि मनाकुन विस्वासमता हरदाल तप्सालय ह्ळांतुरो, असंतोरा पोल्लेने अर्राकोटा, वळ्ळिकु हीके-हेके आयाकोटा मनंतोम. इल्हा मुन्ने मनम सिना पिलालुकुनलेहका आयोम.

15 इंका पावरमते निजम वळ्ळकसेक, मना तल्लालेसीं मनना किरिस्तुना बेसतनम मनालोप्पो बेर्सि, मनम हरेक पोल्लेते ओनालेसीं आयागोम.

16 मेंदुल्ले मनना कील्कु-नर्राल्कु मेंदुल्ला वैरे-वैरे बागाल्कुन बल्हा अयते उंदान्कु-उंदि अंटिच्चि इर्रांतंगो, अल्हे किरिस्तुना मेंदुल आसि मत्तोर्कुन ओरे अंटिच्चि इर्रांतोर. मेंदुल्ला हरेक बागम, मेंदुलतोनि कलियसि अवुना कबाहक अव बरोबर कीतेने मेंदुल बेस बरोबर मनंता. अल्हेने कलिसियातोरगुडा वरोन-वरोर पावरमते ह्ळ्ळसेक, ओर्क पेन हीता कबाहकुन बरोबर कीते, ओर पेनदापोर्रोटा बरोसाते बेस बेर्सितुर.

पेन हियाना पूना गुनाल्कुने बेस एदगट

17 अदुनहाटीं सामिना पोरोलते नना मीकु विनंति कीसि वेहानद बतल इत्ते, यहुदि आयवोर बल्हा ओरा बत्तक ओज्जुवा विचाराल्कुन परकारम ताकंतुरो, अल्हा मिमेट इंदकेटाल मर्रा ताकमट.

18 ओरा विचाराल्क बत्ताके ओज्जाकोटा आतां. ओर्कु तेल्चि तक्को मत्ताहाटीं ओरा मनसु बंडालेसीं गट्टिपळसोल्ता. अदुनहाटीं ओर पेनदुन तेल्पिचकुना हिल्लुर. इल्हा पेन हियाना पूना पिस्वरताल ओर्कुन लक्कु कियमळ जर्गता.

19 ओर्कु सिग्गु इत्तद बतले हिल्लुवाहेंका अन्नि तीरकुना कराब कबाहक कियाना लालचतेन ओर कूस मनंतुर.

20 गानि मिमेट किरिस्तुना बारेमते करियतस्के इसोंटा पोल्ले करिया हिल्लिर.

21 मिमेट निजमे किरिस्तुना बारेमता पोल्ले केंजतिर. अचोने आयाका येसुना बारेमता सत्तेमतुन, बल्हा मत्तद अल्हे करियतिर.

22 अय्ते मीवा पडाना पिस्वरते मत्ता गुनाल्कुन इंदके तेंडसि पोहाट. अब गुनाल्क मीलोप्पो कराब कबाहक कियाना आसे पुट्टिचि मीकुन पाडगीसि पोहंतां.

23 मिमेट बतल अय्ते करियतिरो अदुन पीसि, मीवा आत्माते पूना गुनाल्क वासि मिमेट बेस एदगत.

24 पूना गुनाल्कुन पेन दानालेहका सत्तेमते तयार कीता, पवित्र कीता. अदुनहाटी मीवा पडाना गुनाल्कुन होळसिसि पेन हियाना पूना गुनाल्कुने ताकट.

पेनदा आत्माकु दुक्कम हियमट

25 मनम अंतोरम उंदे मेंदुल्ला वेरे-वेरे बागाल्क आताहाटी, इंदकेटाल वरोनतोनि-वरोर आबद्दम वळ्कमळ होळसिसि, हरेक मनकल सत्तेमे वळ्कगोम.✧

26 होंग आम्टु गानि, पापम कियमट. पोळ्द अर्राका मुन्नेन मीवा होंग सल्लारगोम.✧

27 मीवा पिस्वरते देय्यमतुन होळिया हियमट.

28 बोर अय्ते मुन्ने दोंगातनाल्क कियुंदुर, ओर इंदके अदुन होळसियना. सतता कय्कुने कस्टम कीसि, बेस तरिकाते कमांचना. अस्केन, अब्सरम मत्तोर्क ओर सहायम किया पर्रतोर.

29 मीवा तोळ्दाल बस्केन कराब पोल्ले पेयसानायो. केंजानोर्कुंक कुर्पा दोर्किसि, ओरा बक्तिते पायदा वायाना बेसता पोल्लेगै पेयसगोम. ओरा अब्सरमतुन पीसि मिमेट वळ्काना.

30 मुक्तिता रोजुनदाका, “ईर ना लोकुल्क” इंचि पेन मीपोरों उंदि सिक्का तंचि इर्ता. अदुनहाटी मिमेट दाना पवित्र आत्माकु दुक्कम वायाकोंटा पिस्सट.

31 मिहगा मनना हेळाहना गुनम, पगा, होंग, वरगेयना बुद्दि, अपमानम कियाना बुद्दि इसोंटा अन्नि कराब गुनाल्क-पोल्लेन मिहागटाल लक्कु कीम्टु.

32 वरोनपोरों वरोंक जीवा नोसि बेस दया हुपिच्चेक, पेन बल्हा किरिस्तुनाहेंदाल मीवा तप्पुकुन मापि कीता, अल्हेन मिमेटगुडा वरोना तप्पुक वरोर मापि कीम्टु.

5

पावरमते पिस्सट

1 मिमेट पेनदा पावरमगल्ला पिलाल्क आंदिर, अदुनहाटीं पेन कीताप मिमेटगुडा कीमट.

2 किरिस्तु मनाकुन पावरम कीसि मनाहाटीं पेनदा मुन्ने मोक्कु आसि, पेनदुक नच्चना गुगलेमलेसीं ओनद ओर बलि आतोर. अदे पावरमते मिमेटगुडा ताकट.

3 मीवा नड्डुम बोगमतनमता बारेमते, अन्नि तीरकुना अपवित्र पोल्लेना बारेमते इंका आस्तिक संबदिस्ता पोल्लेना बारेमते आयि, बस्केने उदूदुलि जर्गानायो. बारित्ते पवित्र लोकुल्लक इसोँटवुना बारेमते उदूदुलिगुडा किय्युर.

4 अचोने आयका रोता पोल्लें, तेल्वि तक्को पोल्लें, कराब कारेड्डाल्क मिमेट कियानायो, मीकु अव सोबांचोँ. मीवा तोळ्दाल सिराप पेनदुक दन्यवाद इनना पोल्लेंगे पेय्सगोम.

5 बारित्ते, बोगमतनम कियानोर, अपवित्र मनकल हिलाकौंटे लालचि मनकल (लालच कियमळ इत्ते, बोम्माना पूजें कीतापे आंता) ईरकु बोर्के आयि, किरिस्तुना आनि पेनदा राज्येमते वारसाहक्क हिल्ले, इंचि मीकु तेळियसे मंता.

6 उतूतूता पोल्लें वळ्किसि मीकुन बोरन्ना पोक्कते अरहानायो हुळाट. बारित्ते इसोँटा कबाहकुनहेंकेन पेन दाना आदेस परकारम ताकवोरपोर्रोँ होंग हूपसंता.

7 अदुनहाटीं मिमेट इसोँटा लोकुल्लकुनतोनि पोत्तु कियमट.

वेलगुने पिस्सट

8 उंदास्के मिमेट हीकटते पिस्सेक मत्तिर. गानि सामिनपोर्रोँ बरोसा इरताहाटीं इंदके मीकु पेनदा वेलगु दोर्कता. अदुनहाटीं वेलगुने पिस्सानोरा संतानमलेहका ताकट.

9 वेलगुने पिसते सिराप अन्नि तीरकुना बेसतनम, नीतितनम आनि निजम इवे दिसंतां.

10 इंका बतल कीते सामिकु कुसि दोर्कार, इंचि सामिन कूस कियाना विचारमतेन बस्केळक मंटु.

11 अचोने आयका, बताके ओज्जुवा हीकटता कबाहकुने मिमेट पोत्तु आयमट. गानि असोँटा कबाहकुन पलाते अरहट.

12 बारित्ते मक्किस कियना ओरा कबाहकुना बारेमते वळ्कमळगुडा पेदूदा सिगलसेटे आंदु.

13 गानि इसोंटा पलाते अरता अन्नि कबाहक वेलगुने दिस अरंतां. अन्निटवुन दिस्सानाल कियानद वेलगु आंद.

14 अदुनहाटीगे मरि,

“अरे निद्राते मनानोना, हातोराव्टेताल तेदसि उद्दा.

किरिस्तुना वेलगु नीपोर्रो मेर्साता,”✧

इंचि रासि मंता.

बुद्दिदेते ताकट

15 अदुनहाटीं मिमेट बल्हा ताकंतिर? परमेका कीसि हुळाट. बुद्दि हिल्वोनलेसीं ताकमट, बुद्दि मत्तोनलेसीं ताकट.

16 इव रोजकु बेसतव आयों, इंचि दोर्कता हरेक मोकातुन बेसताहाटीं वाळकुंट.

17 अदुनहाटीं सामिना इच्चा बतल मंतानो, बेस एरपाट कीसि ताकट, बुद्दि हिल्वोरलेसीं मनमट.

18 इरगा कल उंचि ऊंगसेके मनमट, कल रिम्माते मीहेंदाल पापम जर्गा परंता. कल उंचेके मनानदानकन्ना पवित्र आत्माते निंडिसि मंटु.✧

19 इंकावरोनतोनि वरोर बस्केळक बक्ति पाटां, पेनदुन तल्सकुनना पाटां, पेनदा पाटां पारसेके, सामिन मीवा मनसुने बस्केळक मति कीसेके मंटु.✧

20 अन्नि पोल्लेनाहाटीं, मना सामि येसु किरिस्तुना पोरोलते मना पेनबाबांक बस्केळक दन्यवाद कीसेके मंटु.

21 मनसुने किरिस्तुना वेंरे ईर्सि वरोंक-वरोर लोंगिस मंटु.

मुत्तो-मुय्दोंक कोन्नि आदेसाल्क

22 मरमि आता मुरताहकुनिटा, बल्हा अयते मिमेट सामिकु लोंगिस मंतिटो, अल्हेन मिमेट मीवा मुय्दुर्कुंकगुडा लोंगिस मंटु.✧

23 बारित्ते, किरिस्तु बल्हा कलिसियाता तल्लालेसीं मंचेके कलिसियातुन ताकसंतोर, अल्हेन मीवा मुय्दो मीकु तल्लालेसीं मंतोर. कलिसियातुन पिसागोटनोरगुडा किरिस्ते आंदुर.

24 कलिसियातोर अंटोर बल्हा किरिस्तुंक लोंगिस मनांतुर, अल्हेने, मुत्तोहकगुडा अन्नि पोल्लेने अवुना मुय्दुर्कुंक लोंगिस मनागोम.

✧ 5:14 रोम 13:11-12; यसायाह 60:1 ✧ 5:18 नीतिवचन 23:31-32; गलातिया 5:21-25 ✧ 5:19 कुलुसि 3:16 ✧ 5:22 कुलुसि 3:18; 1 पत्र 3:1; उत्पत्ति 3:16

25 अय्ते ए मरमिं आता मांडसुरिटा! किरिस्तु बल्हा कलिसियातुन पावरम कीसि, दानाहाटीं ओना सतता जीवातुन हीतोर, अल्हेन मिमेटगुडा मीवा मुत्तोह्कुन पावरम कीम्टु.

26 अस्के दान किरिस्तु, पेनदा पोल्लेतोनि* सक्कगा साप नोर्सिं पवित्र कीतोर.

27 अस्के अद पवित्र आनि दोसेम हिलाकोटा आंता. पजा दान बदे कसुरता डाग हिलुवा, पापमता मच्चा हिलुवा इंका बदे तप्पु हिलुवा जगाजगा मेर्सना कलिसिया कीसि, ओना दग्गेरा निल्हाकुंतोर.

28 अल्हेने मुय्दुर्कगुडा ओर ओरा मेंदुल्लतुन बल्हा पावरम कीतुर, अल्हेन ओर ओरा मुत्तोह्कुन पावरम कियगोम. सतता मुत्तोन पावरम कियानोर, सतातुनगुडा पावरम कीतोर.

29-30 बोरें मनकल बस्केने ओना सतता मेंदुल्लतुन हय्साकोटा मनाहिल्लोर. दान्क बदुल ओर दान बेस ऊळगेम कीतोर. अल्हेन कलिसियातोर मनम अंतोरम किरिस्तुना मेंदुल्ला वें-वें बागाल्क आंदुम. अदुनहाटीं किरिस्तु ओना कलिसियातुन बेस हळकुंतोर.

31 इदुना बारेमते दर्मसास्त्रमतेगुडा,

“इदुनहाटींगे वरोर मांडुसा ओना तल्लुर-बाबोन होळसि,

ओना मुत्तोतोनोनि कलियसि मनांतोर, ओर इव्वुर उंदे मेंदुल आसि पिस्संतुर,”

इंचि रासि मंता. ☆

32 इद अय्ते उंदि पेद्दा मर्मम आंद. अयना नना अय्ते किरिस्तु आनि कलिसियाता बारेमते वेहचंतन.

33 बल्हैना बेसे! मीवावेटाल हरेक मांडुसा, मीवद मिमेट सतातुन बच्चोन पावरम कीतिरो, अचोने मीवा मुत्तोतुनगुडा पावरम कीम्टु. अल्हेने मुत्तोगुडा मुय्दोना कदर कियगोम.

6

पिलाल्क, तल्लुर बाबो बल्हा मनना?

1 पिलाल्कुनिटा, सामिना पोल्ले परकारम, मिमेट मीवा तल्लुर-बाबो वेहताप ताकट, इदे मीवाहाटीं बेस.

* 5:26 पोल्लेतोनि इग्गे पेनदा पोल्ले उंदि एतसोटद इंचि अर्तम कीकुनना. ☆ 5:31 उत्पत्ति 2:24

2-3 बारित्ते, “मिमेट मीवा तल्लुर-बाबोना कदर कीम्टु, अस्के मीकु अन्नि बेसे जर्गता आनि बूमिपोर्रो मीवा आव्सुगुडा बेरसंता,” इल्हा दर्मसास्त्रमते रासि मंता. पेन हियाना पोल्ले कलियसि मनना मोदाटा आदेस इदे आंद.☆

4 बाबालोरिता! मिमेट मीवा पिलालकुंक होंग वाया हियमट. दान्क बदुल सामि वेहता हरदुन, पोल्लेन ओर्क कराहसेके ओर्कुन बेस पोस कीम्टु.☆

मालक आनि दासुड बल्हा मनना?

5 दासुल्कुरिता! इद बूमिपोर्रोटा मीवा मालकुल्कुना पोल्लेपोर्रो मंटु. मिमेट किरिस्तुना कदर कीताप, ओरदगुडा कपटम हिलुवा मनसुनाल कदर कीसेके ओर्कु वेरियसि ताकट.

6 सिराप लोकुल्क कूस आयगोम इंचि हुप्सालय सेवा कियानोरलेसी मिमेट कियमट. दानकु बदुल, पेनदा इच्चा परकारम किरिस्तुना सेवा कियाना दासुल्कुनलेसी मनसु तासि कबळ कीम्टु.

7 मिमेट कियना सेवा मनकानद आयो गानि सामिना सेवा आंद इन्कुंचि कुसिते कीम्टु.

8 कबळ कियानोर दासुडे आयिर, दासुड आयवोर आयिर! ओर कियाना बेस कबळतुन पीसि ओन्क सामिनाहेंदाल इनाम दोर्कता, इद मिमेट मति इर्राट.

9 मालकुरिता! मिमेट मीवा दासुल्कुन वेरहुळ-बेदरिच्चुळ कियमट, ओर्कुन बेस हळकुंटु. मीवा इव्वुरागुडा मालक स्वर्गमते मंतर. ओर सिन्ना-पेद्दा हळोर, इद मति इर्कुट.☆

पेन हीता आयुदाल्कुन वाळकुंटु

10 आकिरते नना वेहानद बतल इत्ते, सामिनतोनि ओना पेद्दा ताकतते उंदासि मंटु.

11 देय्यमता ताकतता मुन्ने वेरियाकोटा नित्तालय मिमेट पेन हीता अन्नि आयुदाल्कुन* वाळकुंटु.

12 मना लडाइ मनकालोरा विरोदमते आयका, हीकट राज्येमतुन ताकसानोरा विरोदमते, हीकट राज्येमता अदिकारिल्कुना विरोदमते, हीकट राज्येमते मनना सक्तिना विरोदमते आनि मब्बुने दिस्सना दुस्ट सक्तिना विरोदमते मंता.

☆ 6:2-3 निर्गमन 20:12; व्यवस्ताविवरन 5:16 ☆ 6:4 व्यवस्ताविवरन 6:7; नीतिवचन 3:11-12; नीतिवचन 19:18; नीतिवचन 22:6 ☆ 6:9 व्यवस्ताविवरन 10:17; 2 इतिहास

19:7 * 6:11 आयुदाल्क विसरे.

13 इंचि आ सेड्डा रोजकु वातस्के वेरियाकोंटा नित्तालय मिमेट पेन हीता अन्नि आयुदाल्कुन पीकुंटु. अस्के मिमेट कियानद अन्नि पुरागा कीसि आकिरदाकागुडा नित्तिसि मना परकिट.

14 अदुनहाटीं मिमेट सल्लेमतुन नडि पट्टालेहका दोह्चि, नीतितुन इनुम अंगिलेहका† मेंदुल्क केरसि,✳

15 सांति हियना बेसता कबुरतुन वेहना तयारिता हेरपुह्कुन कालकुंक केरसि तयारते मंटु.✳

16 इव अन्निकन्ना मुक्केमातद बतल इत्ते, लडाइ कियनेके मिहगा डालुनलेहका‡ विस्वासम मनगोम. अस्के देय्यमताहेंदाल पोतसेके वायना अन्नि बानाल्कुन मिमेट आपा परकिट.

17 इंका मुक्तितुन हेल्मेटलेहका§ तल्लक कळ्हासि, आत्माता कसेर इत्ते पेनदा पोल्लेतुन कसेरलेहका कय्दे पीकुंटु.✳

18 अन्नि वेलाने पवित्र आत्माते बस्केळ्ळ पारतनां, विनतिं कीसेके मंटु. इंका अंतोर विस्वासुल्कुनाहाटीं आगाकोंटा बस्केळ्ळ पारतना कीसेके मंटु.

19 इंका नना बस्के-बस्के अय्ते पेनदा पोल्लें कराहलय तोड्डि तेहांतन, अस्के-अस्के नाकुंदि बेसता कबुर दोर्कालय नावाहाटीं गुडा पारतना कीम्टु. दीनहेंदाल नना पेनदा बेसता कबुरते मत्ता मर्ममतुन वेरियाकोंटा वैरेतोरक वेहा परकन.

20 दीनाहाटींगे नना कयकुंक बेडीं वाटसि मत्ता पेनदा कबुरतो न आतन. दीनहेंदाल नना बल्हा अय्ते वळ्ळागोमो अल्हा वळ्ळकालय नाकु दैरनेम दोर्कानाहाटीं पारतना कीम्टु.

21 तुक्कुस इनना वरोर पावरमगल्ला दादाल मंतोर. ओर सामिना वरोर बेस विस्वासमगल्ला सेवक आंदुर. नना इगे बल्हा-बतल मंतन इंचि अन्नि पोल्लें मीकु वेहानुर.

22 मावा परिस्तिती बल्हा मंता इद मीकु तेळियागोम आनि मी अंतोरा जीवांक दैरनेम, सांति दोर्कगोम, इंचि नना ओन मिहगा लोहतन.

† 6:14 इनुम अंगि इत्ते लडाइ कियनेके मेंदुल्क कसेटे कोहकतस्के कसेर होळियाकोंटा केरनद उंदि इनुमता अंगि. ✳ 6:14 यसायाह 11:5; यसायाह 59:17 ✳ 6:15 यसायाह 52:7; नह्म 1:15
‡ 6:16 डाल लडाइ कियनेके मुन्नेटा सिपाइ कसेटे तंतस्के ओना कसेटुन आपालय कय्दे पियानद उंदि वस्तु. § 6:17 हेल्मेट तल्लक देब्बा दल्गाकोंटा तासकुनना उंदि वस्तु. इद कालमते लोकुल्क मोटोर सायकलते होननेके तासकुंतुर. ✳ 6:17 यसायाह 49:2; इब्रि 4:12

23 अंतोर विस्वासुल्लुकुंक पेनबाबाल आनि सामि येसु किरिस्तुनहेंदाल, सांति आनि विस्वासमतोनि पावरम दोर्कि.

24 मना सामि येसु किरिस्तुन बोर अय्ते आगाकोंटा पावरम कीतुर, ओर अंतोरतोनि पेनदा कुर्पा हमेसा मन्निकांटी.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068